

Ҳосил байрами: ТИНЧ-ОСОЙИШТА ВА ФАРОВОН ҲАЁТ ТАНТАНАСИ

Шу йилнинг 10 декабрь куни Фарғона отчопарида Қишлоқ хўжалиги ходимлари куни ва Ҳосил байрами катта тантана сифатида нишонланди

Муҳтарам Президентимиз Шавкат Мирзиёев ташаббуси билан жорий йилдан бошлаб декабрь ойининг иккинчи якшанбаси мамлакатимизда Қишлоқ хўжалиги ходимлари куни сифатида белгиланди. Шу муносабат билан пойтахтимизда ўтказилган тантанали тадбирларда бир гуруҳ фарғоналик фермерлар ҳам иштирок этиб, бир олам таассуротларга эга бўлишди.

“Ўзбекистон” анжуманлар саройида бўлиб ўтган тантанали маросимдаги маърузасида Президентимиз қишлоқ хўжалиги соҳаси фидойиларининг меҳнатини эътироф этиш билан бирга олдимизда турган энг муҳим устувор вазифаларга эътибор қаратганлари бежиз эмас,-дейди Қува туманидаги “Қосим карвон” фермер хўжалиги раҳбари, “Шуҳрат” медали соҳиби Қаҳрамон Сиддиқов. – Ҳақиқатдан ҳам фаолиятимизни замонавий мезонлар асосида ривожлантиришни бугунги шиддатли даврнинг ўзи тақозо этмоқда. Шу маънода қишлоқ хўжалигига илм-фан, инновация ютуқларини кенг жорий этиш, фермер хўжаликлари фаолиятини кўп тармоқли хўжаликка айлантириш, тинмай ўқиб-ўрганиш, олимлар билан ҳамкорликда ишлаш, кадрлар малакасини ошириш каби жиҳатларга жиддий эътибор қаратишимиз зарур. Байрам тантанасида барча ҳамюртларимиз қатори бир гуруҳ фарғоналик фермерлар, қишлоқ хўжалиги соҳаси фаолларига шахсан мамлакатимиз раҳбарининг ўзлари давлатимизнинг юксак мукофотларини топширганлари қалбимизга чексиз ғурур-ифтихор бахш этди.

Ташриф давомида ишлаб чиқариш корхоналаридаги маҳорат дарслари, қишлоқ хўжалиги техникалари, миллий ҳунармандчилик кўргазмалари ташкил этилиши, мустақиллик майдонида саёҳат, миллий театрдаги томошалар истиқболли лойиҳаларни амалга ошириш, дунёқарашимиз, тафаккуримизни кенгайтиришда муҳим аҳамиятга эга.

Фарғона отчопарида ўзбекона удумга кўра карнай-сурнай садолари билан бошланган байрам, халқ сайли каттаю кичик бугунги дориломон кунлар шукронаси билан яшаб, сидқидилдан меҳнат қилаётган, тинч ва фаровон юртда қутлуғ кунлар бардавом эканлигидан далолатдир. Шу куни вилоятимизнинг барча шаҳар-туманларидан келган меҳмонлар учун савдо ярмаркалари ташкил этилди, миллий қадриятларимизни намоён этувчи дорбозлик ўйинлари, полвонлар, масҳарабозлар, қизиқчилар, қўғирчоқ театри томошалари ўтказилди, фольклор жамоалари, машҳур эстрада хонандалари, мумтоз куй-қўшиқлар ижрочиларининг чиқишлари барчага хуш кайфият улашди. Вилоятимизнинг 19 та шаҳар-туманидан келган энг маҳоратли ошпазлар иштирокидаги ош танлови байрам қатнашчиларида унутилмас таассуротлар қолдирди. Сўх тумани вакили Холдорали Тешаев, олтиариқлик Муродил Исабоевлар томонидан тайёрланган паловхонтўра кўпчиликлари жуда манзур бўлди.

Бундай байрамлар нафақат ширин дийдор, йил мобайнидаги чарчоқларни чиқарувчи мароқли ҳордиқ, балки эртанги кун истиқболи учун янги режалар белгилаш, ўзаро тажриба алмашишда ҳам жуда қўл келади, – дея суҳбатга қўшилади Бувайда туманидаги Чўтака МФЙ раиси Ҳомиджон Ботиров. – Ҳар бир қарич томорқа еридан унумли фойдаланиб, анжир, картошка ва бошқа сабзавот экинлари етиштиришдан келаётган улкан даромад маҳалладошларимиз турмуши йилдан-йилга яхшиланиб боришини таъминляпти. Бугунги тадбирда энг миришкор томорқачи маҳалладошларимиз билан бирга иштирок этмоқдамиз.

Халқимизнинг байрамлари, қувончли кунлари санъаткорларимизнинг куй-қўшиқлари, рақслари билан янада файзли ўтади. Вилоятимизда фаолият кўрсатаётган фольклор-этнографик, бадий жамоалар, Абдужалил Қўқонов, Отабек Муҳаммадзоҳид, Зухриддин Ражабов сингари санъаткорлар чиқишлари барчани шодон даврага чорлади.

Санъат ва спорт соғлом, бахтли ҳаёт омилидир. Турсун Али Муҳаммад бошчилигидаги полвонлар томошалари давомли қарсаклар билан олқишланди. Белбоғли кураш мусобақалари кучли ва чаққон спортчиларни саралади. Нафосат маликалари – гимнастикачи қизларнинг нафис ва назокатли чиқишлари байрам қатнашчиларига жуда ҳам манзур бўлди. Аски¹лар, масҳарабозлар барчага кулги улашишди.

Фарғона отчопарида тулпорлар рақси... Фарғона водийси чавандозлари иштирокидаги улоқ-

кўпқари мусобақалари минг-минглаб томошабинларга ҳаяжонли лаҳзаларни тухфа этди. От устидаги йиқитиш, ўз оти билан тез чопиш ўйинлари энг яхши чавандозларни аниқлаб берди. Кучли, иродали чавандозлар ғолиб бўлиб, улоқ-кўпқарида зафар қучганларга аталган қимматбаҳо совғаларни қўлга киритишди. Фаррух Абдумаликов, Акмалжон Пўлатов каби чавандозлар эпчил ва чаққон хатти-ҳаракатлари билан томошабинлар меҳрига сазовор бўлишди. Якунда от спорти бўйича Фарғона вилояти терма жамоаси аъзолари, Фарғона, Фурқат, Данғара туманидан ташриф буюрган чавандозлар яхши натижаларга эришдилар.

Байрам тадбирларида вилоят ҳокими, Ўзбекистон Республикаси Олий Мажлиси Сенати аъзоси Шуҳрат Ғаниев иштирок этиб, савдо ярмаркаси фаолияти билан яқиндан танишди ва иштирокчилар билан самимий суҳбатлашди. Ош танлови, улоқ-кўпқари мусобақалари ғолибларига вилоят ҳокимлигининг эсдалик совғаларини топширди.

Ботир МАДИЁРОВ,

Соҳиба АБДУРАҲМОНОВА,

“Фарғона ҳақиқати” махсус мухбирлари.

Суратларни Шамсиддин ҚОРАБОЕВ, Жаҳонгир МИРЗАМАТОВ олган.

2017-12-12 12:27:15